

大宋新譯三藏聖教序

冠

御製

大矣哉我佛之教也化導群迷闡揚  
 宗性廣博宏辯英彥莫能究其旨精  
 微妙說庸愚豈可度其源義理幽玄  
 真空莫測包括萬象譬喻無垠綜法  
 網之紀綱演無際之正教拔四生於  
 苦海譯三藏之秘言天地變化乎陰  
 陽日月盈虧乎寒暑大則說諸善惡  
 細則比於恒沙舍識萬端弗可盡述  
 若窺像法如影隨形離六情以長存  
 歷千劫而可久須彌納藏於芥子如  
 來坦蕩於無邊達磨西來法傳東土  
 宣揚妙理慎從指歸彼岸菩提愛河  
 生滅用行於五濁惡趣拯溺於三業  
 途中經垂世以難窮道無私而永泰  
 雪山貝葉若銀臺之耀目歲月煙蘿  
 起香界之自遠巍巍罕測杳杳難名  
 所以道資十聖德被三賢至道起於  
 乾元眾妙生乎人易摠繁形類竅鑿  
 昏明絕彼是非開茲蒙昧有西域法  
 師天息災等常持四忍早悟三乘翻

貝葉之真詮續人天之聖教芳猷重  
 啓運偶昌時潤五聲於文章暢四始  
 於風律堂堂容止穆穆輝華曠劫而  
 昏墊重明玄門昭顯軌範而彌光妙  
 法淨界騰音利益有情俱登覺岸無  
 成障礙救諸疲羸冥昧慈悲浩汗物  
 表柔伏貪恨啓滌昏愚演小乘聲聞  
 合其儀論大乘正覺立其性含靈悟  
 而蒙福藏教缺而重興幻化迷途火  
 宅深喻雖設其教不知者多善念生  
 而無量潛臻惡業興而隨緣皆墮調  
 御四眾積行十方澍花雨於金輪護  
 恒沙於玉闕有頂之風不可壞無際  
 之水弗能漂澄寂湛然圓明清淨之  
 智慧性空無染妄想解脫之因緣可  
 以離煩惱於心田可以得清涼於宇  
 宙朕慙非博學釋典微聞豈堪序文  
 以示來者如摩瑩燭火不足比之於  
 昧日將微蠶量海未能窮盡於深淵  
 者哉

佛三身讚

佛三身讚 西土賢聖撰  
 曼殊室利菩薩吉祥伽陀 梵家數中  
 文法別行

佛三身讚

第三卷

一

法身

我今稽首法身佛 無喻難思普徧智  
 充滿法界無罣礙 湛然寂靜無等等  
 非有非無性真實 亦非多少離數量  
 平等無相若虛空 福利自他亦如是

報身

我今稽首報身佛 湛然安住大牟尼  
 哀愍化度菩薩眾 處會如日而普照  
 三祇積集諸功德 始能圓滿寂靜道  
 以大音聲談妙法 普令獲得平等果

化身

我今稽首化身佛 菩提樹下成正覺  
 或起變現或寂靜 或復往化於十方  
 或轉法輪於鹿苑 或現大光如火聚  
 三塗苦報悉能除 三界無比大牟尼

迴向

如是佛身無漏智 我常信解淨三業  
 以無量慧大福行 一心垂愍諸群生  
 以今頌讚三身佛 所獲無漏功德種  
 願我速證佛菩提 盡引眾生歸正道

佛三身讚

佛三身讚

第三卷

一